

40 ans de l'Amicale des Taignons - samedi 30 août 2014 - Le Noirmont

Adj'd'heu à in djoé de fête, de seûvni èt de r'cognéchaince.

C'é po moi in hanneur èt in piaiji tot particulie de vôs aippetchaie lo bondjoé d'lai Fédération Jurassienne des Patoisaints.

Nôs sont r'djoindre à Nairmont pô entoélaie nôt aimis patoissainnes èt patoisaints taignons pô mairtiaie ène cobin impoétchaine de loûe aimicale.

Aimicale indg'niaie en 1974, quairante ans de vetchainces, envétchi de fêtes, de pieces de théâtre tchu les lavons, de tchîns, de djâseries, de r'ceugnons, de souchies èt i en pèsse.

Nôs sont fie de nôt retrovaie pô paitaidgie ensoinne des môments de fête.

Pô les aimoieus de note paitrimoine, sâ in pèssaidge impoetchaint ; pô lai vétchaince de son djâsaidge, lô patois è fête de raissembiaie cès qu'le cognéchant encoé peu mâ.

Aimies èt aimis taignons, vôs ais fai cogniâtre des trésoûes chu lô pèssè de nôt ainnès. Langaidge di peupye, vrâ, fraint, immaîdgie ; in pailaie fiaie. Faire tchaintaie en nôt arayes nôt veyes mots patois fai paitchie de note tilture.

I r'méchie les patoisainnes èt les patoisaints de l'Aidjoue, di Va de D'lémont de Môtie èt de l'âtre san d'lai frontiere de s'aissôciaie pô l'djubilè de l'aimicale des Fraintches-Montaignes .

Ensoinne, nôt in aichistraie en in ôffice de relidgion rdument bé, ène belle mâsse tchaintaie en patois poé lai chorale des aidjolats, in bé chërmon présentaie poé lo tchaloune Oouvray. E aivai dĩ bé monde a môtie.

Aimis patoisainnes èt patoisaints taignons, i vòs r'méchie de vote engaidgement pèssè èt i se chure aitôt pô l'aivni. El vô fâ cheudre lai landye de nòs anchètres, elle dai d'moéraie èt vòs dai lai fére coégnâtre âtoé de vòs.

Pô lai cheute, i vòs d'minde en tû d'èchurie lai réyeuve, de d'moairie ètentif en lai tradition èt de défendre nòs raiceinnes.

En défendaint lô patois, nòs ains à tiure de botaie en note djûenence èt en cés que cheûdrant, c'que vòs èt moi echtimant c'ment ïn trésoûe qu'ai fâ voidjaie

Lai Fédération des Patoisaints di Cainton é ène pensaie pô ces qu'nòs ïn tyittie pô ïn monde moyeu mais chutôt l'chire Norbert Brahier pô têt c'qu'ai l'ai fai pô l'aimicale des taignons. In dinosaure di patois n'é pu li.

Adj'd'heu, nòs aimis des Frintches-Montaignes ïn bïn fait les tchoses pô mertriaie cte féte. E é c'maindaie lô soraye èt brament de dgens ïn réponju en l'envèllie.

I ai aitôt lo piaiji de baijie ïn croma en l'aimicale ; i aippeule daime Yose, présideinte, c'taie que pèsse brâment de temps pô vos diridgie d'aidroit.

Encoé tote nôte r'cognéchaince de nòs aivoi aichôchiaie en vote djubilè ai peu pô paitaitgie ensoinne, i muse, ène belle fin de vâprèe i en ce chure.

Y veu rataie de djâsaie ; boinne dgens, i vòs r'mécie de m'aivoi écoutaie et vòs di encoé boinne féte en tu. Tchantons, dainsons et boyons ïn bon varre.

Maurice Jobin, présidaint FPCJ